

ӘСКЕРИ ҚЫЗМЕТ – АБЫРОЙЛЫ МІНДЕТ

1986 жылғы 26 сәуір – адамзат тарихындағы ең ірі техногендік апаттардың бірі орын алған күн. Бұл күні Чернобыль атом электр станциясы аумағында жойқын жарылыс болып, бүкіл әлемді дүр сілкіндірген Чернобыль апаты орын алды. Бұл трагедия тек экологиялық ғана емес, сонымен қатар адамзатқа қауіпсіздік пен жауапкершіліктің маңызын ұқтырған ауыр сабақ болды.

Чернобыль қасіреті мыңдаған адамдардың өмірін өзгертті. Радиоактивті ластану үлкен аумақтарға таралып, оның салдары бүгінге дейін сезіліп келеді. Бұл апаттың зардабын жоюға бүкіл Кеңес Одағынан жүздеген мың адам жұмылдырылды. Олардың қатарында 30 мыңнан астам Қазақстан азаматы қатысып, олардың әрқайсысы адам өмірін сақтап қалу жолында жанқиярлықпен қызмет етті. Алайда, осы қиын кезеңде апаттың зардаптарын жоюға қатысқан батырлардың

ЧЕРНОБЫЛЬ ҚАСІРЕТІ: ТАҒЫЛЫМ ЖӘНЕ ДАЙЫНДЫҚ

ерлігі тарихта мәңгі сақталып қалды.

Бүгінде бұл трагедиядан алынған сабақтар әскери дайындық жүйесінде ерекше орын алады. Соның ішінде «М. Әуезов атындағы Оңтүстік Қазақстан университеті» КеАҚ әскери кафедраның қызметінде де бұл бағыт айқын көрініс табады. Әскери кафедра 1963 жылы Қазақ химия-технологиялық институты базасында құрылып, сол жылдан бастап запастағы офицерлерді даярлау жүйелі түрде қолға алынды.

1997 жылдан бастап әскери кафедрада жаңа әскери мамандықтар бойынша даярлау басталып, оның қызмет аясы кеңейе түсті. Бүгінде әскери кафедрада офицерлер мен сержанттар запасы түрлі әскери-есептік мамандықтар бойынша дайындалады. Әсіресе, радиациялық, химиялық және биологиялық қорғаныс бағытындағы мамандарды даярлау ерекше ма-

ңызға ие. Химиялық әскери есеп мамандықтары бойынша оқитын студенттер радиациялық және химиялық барлау жүргізуді, ластанған аумақты бағалауды, арнайы өңдеу жұмыстарын ұйымдастыруды, жеке және ұжымдық қорғаныс құралдарын пайдалануды үйренеді.

Оқу барысында төтенше жағдайлар кезінде бөлімшелерді басқаруға, экологиялық қауіпсіздікті қамтамасыз етуге, жедел әрекет етуге; моральдық-психологиялық тұрақтылыққа ерекше көңіл бөлінеді. Бұл білім мен дағдылар болашақ офицерлерді төтенше жағдайларда дұрыс әрі жедел шешім қабылдауға үйретеді.

Чернобыль апаты бүкіл әлемге дайындықтың, тәртіптің және кәсіби біліктіліктің қаншалықты маңызды екенін көрсетті. Сол кездегі көптеген мамандар қауіпті толық түсінбесе де, өз міндеттерін абырой-

мен орындады.

Ал, бүгінгі әскери кафедра студенттері осы тарихи тәжірибені ескере отырып дайындалады. Олар кез келген төтенше жағдайларда – техногендік апаттарда, экологиялық дағдарыстарда немесе радиациялық қауіп туындаған кезде халықты қорғауға, жағдайды бақылауға және залалды азайтуға дайын болады.

М.Әуезов атындағы ОҚЗУ әскери кафедрасы – бұл тек білім ордасы ғана емес, сонымен қатар патриотизм мен жауапкершіліктің мектебі. Мұнда дайындалған офицерлер мен сержанттар – ел қауіпсіздігін қамтамасыз ететін сенімді резерв. Олар төтенше жағдайларда да, батыл әрі сауатты әрекет етуге қабілетті.

Чернобыль – өткеннің қайғысы ғана емес, болашаққа берілген ескерту. Ал, сол ескертуді назарға алу, дайындықты күшейту – бүгінгі буынның басты міндеті.

**Ислам АХМЕТОВ,
«М.Әуезов
атындағы Оңтүстік
Қазақстан
университеті» КеАҚ
әскери кафедра
оқытушысы,
запастағы
подполковник**